

Mintgamai cun: tematica, magazin e gasetta

(anr/gc) La Terra Grischuna (TG) è la rivista per natira, cultira e temp liber. Ella cumpara 6 giadas ad onn – è bainfatga ed illustrada ritgamain. Gist è la davosa ediziun da la TG da quest onn cumparida. Er ella sa cumpona da la trilogia: tematica, magazin e gasetta. Lezza cuntegn las pli diversas infurmaziuns – e quai en tuts trais linguatgs grischuns. Vitiers vegn ch'ella enserra er il Fegl d'infurmaziun da la Pro Raetia. Ella porta era mintgamai la Pagina rumantscha, la Pagina grigionitaliana, la Pagina per ils Gualsers ed er en tudestg – sco per tuts – notizias, novitads en connex cun vacanzas e temp liber.

Exchavaziuns, chats ed enconuschientschas

En la part tematica vai questa giada «sut terra» cun ils archeologs. Ins è a la tschertga dad activitads umanas per alur pudair valitar quels chats. Malgrà tut quai restan anc adina bleras dumondas avertas. Per las responder basegna i bler temp. Quels chats, fatgs savens suenter blers tschientaners, vegnan alur documentads e mess en il context cun scuvertas da pli baud ed anc cun outras funtaunas scientificas.

I vegn relatà da pliras exchavaziuns en divers lieus da noss chantun. E qua datti mintgagant er ina sorpresa. Rapportà vegn da tala fatga a Cuira, da chats en la tur da Marmels a Marmorera avant plirs



onns, mo era da retschertgas archeologicas en connex cun la construcziun da la via da guntgida a Roveredo. Chats da relicts militars han ins fatg si Surmeir e sin il Pass dal Set. En il labor vegnan alur fatgas anc ulteriuras scuvertas ed ins vegn là tar ina meglra legibladad tras restaurar e cun conservar. Chats interessants èn era munaidas per pudair fixar temp ed epoca.

Il territori dal Trentino, dal Tirol e da l'Engiadina Bassa è propi l'origin dal retic. Quai munta pia che retic n'è betg dal tut identic cun grischun. – Ils culms grischuns cuntegnan petrificaziuns dad animals e plantas daditg svanids sco perditgas da l'evoluziun che van enavos fin 300 milliuns onns. En la tauna Drachenloch sur Vättis en la Val Tamina è vegnì chattà fastiz da vita umana d'avant pli che 50 000 onns.

Magazin fitg varià

Il Magazin dat ina retrospectiva sin la dieta champestra da la Pro Raetia da quest atun a Scuol. Preschentà vegn il nov zain da la baselgia parochiala a Zeras. – Recumandada è ina tura cun skis sin il Piz Tomül en Val Stussavgia. – In inscunter dat i cun la poetessa *Flandrina da Salis*, naschida a San Murezzan e ch'abita oz a Zumikon. – Rendi attent vegn anc co uffants nizzegian en in workshop a Tavau la tiba per rinforzar lur lom.

Frontispizi dal magazin. MAD